

四庫全書

集部

欽定四庫全書

衡廬續稿卷八

明胡直撰

墓誌銘

龍西華先生墓誌銘

予總角遊豐而里中西華先生已翔文場試首冠先生
不予穉一見忘年期許覲輒驩甚歲庚子先生得雋江
藩又三年予乃繼踵偕上春官得朝夕其論而益知先

生之高雅與俗趣殊轍後予入仕比歸先生不金玉其章貽予令人寶不可置心擬時時叩予雲之室而今不可幾矣先生冢嗣朝宰手其姪孫太平二守澄源君所為狀謁銘予既辱好又欽君之嫻於文是故於銘也曷辭按先生先世由京兆令永新家焉繼徙今泰和甘溪里嘗有兄弟五人同舉其諱登騰者並登淳祐進士騰之後有震翁事母至孝時有枯梅六月而花事聞理宗朝表為孝梅命詞臣盧摯作記又御製七言詩獎異之

明興樂山公諱仁安以長子驗封公貴贈祠部主事驗封公兄弟亦五其四曰某某四傳生梅坡公某娶某氏子三長諱子用舉嘉靖壬午尹行唐其季即先生諱子昂字行敬別號西華西華先生自幼奇穎讀書過目成誦文辭全通督學試輒高等至王公尤賞異曰此王守溪流亞也一時名動四方從者如雲然性方介不能詭隨人於遨藝時宗藩以戚好禮致之竟弗之往既舉于鄉兩上春官不第乃就乙榜補江陰學諭聘典東粵試

事相繼丁艱復補休寧歙縣其墨義經旨有大造于三
邑士陞令封丘封故衝疲民多驚悍先生痛抑豪強為
民刷除虛稅代輸公逋惟趨拜不以時局一自信其衷
不為獵虛以是致忤上吏而卒無以中也乃以簡改上
津先生赧然笑曰能改吾封丘令為上津令而奚能改
吾令封丘者令上津也為之措刑緩斂裋身彌礪一意
與民休養不為鈞距事暇輒閉閣繙閱古載籍衙內蕭
然若僧舍督撫中丞廉其政偉之曰是真能為護養元

元者委特隆篤丙辰赴覲奉部檄遴典簾外事督撫佇
上章薦之而先生故弗喜仕乃竟托疾乞休連九請始
得歸歸之日民泣送為之載道先生家居廿餘年嘗塊
坐一室外事一不挂耳課其子若孫以一經或自為時
藝武之性喜賦咏值佳辰則召子姓命酒為歡既醉必
為詩以咏之去城不啻許然多削迹或不通邑大夫姓
字踰年繡衣使者古松段公暨撫臺應谷劉公故皆善
先生各戒吏致起居先生竟弗一造謝焉後撫臺楊震

厓公聞之嘆曰是淵明再見也因扁五柳高風贈焉先生天性孝友養色承志初薦例得坊金百時方匱則以獻梅坡公為壽而公宿貯不貲恣所與一弗問晚與伯兄見稍抵情故弗間伯兄暴終先生痛絕為理喪事家務悉當人益服之平生所撰詩集若干卷臨終神氣凝然呼筆示身後事又自著西華小傳曰無令煩名筆諛墓中耳先生享年七十有六元配陳孺人繼余俱前卒又繼康副張伯子朝宰庠廩生有雋才類先生仲朝賓

陳出女一張出壻歐陽文孫孫男四學易學書學詩學
文孫女一適楊某曾孫女一聘胡某朝宰卜今年某月
某日葬本里某向之原予既序次其事又未嘗不嘆慨
思之也夫今世官比民者不啻裝幾十百橐而先生獨
嶢嶢涼涼與世負絕世並難之矣乃不知先生致歸時
其傳經士楊銀臺方柄銓事朱大司空漸都顯地先生
不一徊翔盼慕引手而決去若脫煩歆然於今世為幾
見且夫林居市交者往往幾當塗為推轂甚則誣指上

吏孰我門孰我故以攝閭左右為圉奪先聲以是較諸先生則誠談腐鼠於鷄鶩間也又豈啻相什伯哉予以是免諛墓誚矣銘曰

維公奇穎疇則毓之玉華炳靈維公貞姱疇則儷之甘水澄泓文敷三邑譽髦斯成澤濺兩邦腹藉殘民出膺畏塗靡斲其真處謝羣鷺獨葆其神曷豐乃器而嗇厥行冥冥者鴻振振者麟蛻藏玄丘精歸蒼旻

雲南按察司憲副毅齋楊公墓誌銘

予伏石蓮吉水楊生應祥侍則談其族父毅齋公之令
終然予故善公心知公所為有原本已而二孤以予友
鄒方伯撰狀請銘將以某年月日葬公某山某向之原
按狀公諱儲字元秀別號毅齋其先南唐虞部侍郎輅
再傳徙吉水湓塘而有忠襄文節又幾世徙廬陵逢塘
曾祖德淵祖主敬廣西桂林衛經歷父珙以公貴贈監
察御史母李氏贈太孺人公其仲子也御史公嘗為廣
西梧州府照磨時征叛徭例不當臨戎乃慨然請先臨

敵死之時公八歲從太孺人奔喪哭奠如成人人指目曰此真忠義後也公長身廣額脩目巨耳美髯過臍寸許弱即端重太孺人性嚴子有過輒數日損言笑公日夜跪受過少解乃已稍長以麟經補郡庠乙未援例入北雍丁酉下第乃偕同事留京邸淬礪者三年庚子中順天鄉試捷聞獨無喜色曰一舉未足以畢生平又諭同榜必勉期報國毋沾沾懷私便心衆咸慙曰公言是公言是丁未再上春官不第遭太孺人變哀毀幾絕水

漿不入口者三日既葬猶悲慕不釋庚戌謁選授湖廣
衡州府推官既至刻廉自喜遇讞獄亭疑必反覆求其
生不得輒瘁然見顏面雅曰與其殺不辜寧失不經故
終司理之任不輕入一大辟衡陽故多逋賦公代署為
破崖岸諭以至誠弛期寬刑不問多寡親收而民反爭
先輸納彌月至數千金又嘗代署捕則能以奇畫擒黠
寇直指使梅林胡公雅重公檄為彌封官凡春秋卷屬
公者無相可否公既清約外父至訝曰署中何殊僧舍

衡人無佗倪稱楊青天太守白石蔡公恒為嘆服常奉
直指使檄查全楚人不敢私干有一邑簿以病艱迎伺
暮扶疾跪獻數十金公叱而却之已而廉簿駭無他過
竟貸不罪癸丑冬拜貴州道監察御史衡民泣挽不得
行比行懸橐出門肅皇帝末年事玄公賀表致諷忤旨
廷杖四十幾斃勲戚人稍不法不少假丙辰出按河東
鹽法至則貪墨吏望風解綬去者數人于是為清蹉通
商牢盆之政一新值地震乃出鍤金檄有司行賑全活

者衆葦河東書院羣所屬生講業其中暇則親課文品
第之士益彬彬行部至衛謁子路墓增修其祠宇手為
文樹碑躬致祭戊午按北直隸未履境有撫臣餽兼金
奇貨不啓封返之事竣舉刺一無徇部中每見公疏即
曰此楊侍御直筆也為覆行無異同辛酉再案晉晉故
多強宗貧者至無給公處之有方莫不懷畏是秋鄉試
公矢公飭度百執事咸凜凜閱卷輒衣冠端坐至夜猶
凝然無跛倚極倦惟瞑目少頃或勸弛服叱曰上為主

上求賢下則士進之始事也是烏可慢故事秋季防邊多委官行公躬閱三關猝遇敵衆請旋旆公曰今日正臣子致命之秋逗進者斬衆志甫定乃隲險樹營竟以先聲奪敵氣敵輒遁去公與時宰雖四門姻然絕無阿比每不得其歡心歷御史俸八年矣乃出為湖廣布政司叅議分守下荆南兼提督太和山太和故有中官共事其人頗擅威福聞公至輒戒其下毋輕相犯公所行咸斂手憚服無撓有知州劉欽命者以事忤中官被奏

誣荷械行公適外歸乃力為辯誣移文撫按復致書當
塗且曰無令中官箠有司中壑欲也劉竟得免幾歲擢
雲南按察司副使報至即忻然曰吾欲歸久矣遂封還
璽書長往既歸杜門懸車絕聲色遊宴之娛謝綺麗不
復御遇先忌必潔服茹蔬觴豆跪進畢則手自徹儼若
事生居鄉務善俗乃立鄉約抑浮息訟有爭質成歲以
祀事一至郡城不謁有司盡絕干請郡縣至不識面而
事關民隱最切輒慨然以書達無不為罷行晚年闢一

圃常角巾布袍督植茗蔬為樂客至語及時政不答故吏門人泣江省者無隻字之交聞薦即愀然曰非吾意也先是雅與鄒文莊公遊東山講孟子鷄鳴章及孩提仁義之旨頗然有省又與羅文恭公講于石蓮咸有深契長兄休寧簿某事如父友其弟光祿署丞某靡違所欲少時與吉之高君珍彭君魯友善高同舉順天彭竟窮約歲時問訊罔間宦遊輒致水土物彭卒為服總麻奠賻最腆暇則期高君會金鰲赤石間縱談古今善敗

是非不及時事高君卒公銜哀蔬食為經紀其葬而重恤厥孤時論高之其他任恤類此歲時祖墓祠宇橋梁水利類破百金不恡嘗懸一磬座右戒童子曰若伺吾有惰容輒聲磬居聞磬未嘗不儼然危坐也對家人父子若嚴賓鄉人多嚴憚之戊寅七月中忽語二子曰生死常事吾頗不動心第惟若等當勉修以不辱宗既望猶率行鄉約冠服竟日無惰十九日與弟姪談養生歡若平時及晚沐浴更衣夜微不寧至念日端坐兩目炯

然鬚髯飄飄家人訊後事不語乃知其神往矣方卒時
烈風迅雷交作電燭榻席既逝天星朗燦人莫不異之
距其生弘治壬戌四月十三日享年七十有七娶羅氏
贈孺人繼王氏封孺人子二長某次某予以鄒君狀論
公之世則古所稱外不絕俗而內不失真者予未數數
見也而僅見公銘曰

蓋予聞古之至人兮尊神明而下穢麤餐正陽之壹氣
兮練要眇於六虛質龍蛻而鑠化兮神綽約而容與松

喬不可以齊年兮翳騰精而上清都惟嶽然之蓋臣兮
穹德義以自廬既遠追於關西兮又近希乎襄節之故
途誕齋居以精醇兮抑直氣之不回紆其壽豈兮若游
其死則愉神翔大儀為列星兮嗣彥為駒金聲玉色不
可挹兮瞻遺封之隔如

嘉議大夫南京太常寺卿一厓郭公墓誌銘

一厓郭公以其年月日終正寢季子某冢孫某既請予
友陳亞中公狀其事屬予銘曰此先大夫治命也予走

奠恩江訊知以是月十有八日奉定公某里某山之原
予言奚敢後蓋予昔交公秦淮間嘉靖之著雍敦牂公
為刑科右給事中會琉球請封其世子尚元為中山王
詔遣給事中吳時來充正使行有日矣以言事謫去乃
改命得公上悅仍賜一品麒麟服既陞辭告行予時在
比部則語公曰夫海古所謂長為委輸者也公往則若
無色怖何也公曰夫人之死十有三豈皆犯窮溟者哉
矧君命乎予曰公忠且達矣別幾年予歸自東粵公亦

解太常正卿家食久矣郡中二三同志相與期集青原山予因叩浮海事公曰吾浮海有四徵夫人平居語利害不大怵于心至涉境鮮有不撓者方吾始開洋梅花也潮平濤靜瞬目千里何其鬯也頃踰赤嶼邁巨魚舟顛甚雖予與舟中人無不悸廢事竣歸國颺作柁折舟中羣號而予亦憂慄至五日不粒食已而蹶然思曰吾學不在是乎徐自定又思曰吾以死報國分也其如五百人何于是聽舟人請捐所愛物投諸水又口占文授

事檄天神即得風不怒易舵而還吾然後知涉境撓寧
之弗易易也此一徵也夫人旦夜念慮淵淪颺舉蓋烈
于潮與颺矣自非舟舵牢甚弗可救抑孰知吾黨以學
為舟以志為舵乎孔子蓋十五得舟舵故卒登于道岸
此二徵也昔讀杜氏通典紀琉球事以吾所覩記則實
異即永樂間星槎勝覽載翠巖大奇等山及蔗酒事種
種誣也予乃信不行不為真知然則知行果一矣此三
徵也吾昔泛彭鄱稱弘矣至海則不知幾千萬里而始

觀土納已之山是山不知幾千萬里隱若泡影其若是
山者又不知其幾千萬之衆且廣也予乃知海之無不
有也而不見有此四徵也吾浮海僅僅達此予聞之慊
然曰學非徵不自信公且坐進矣已而與二三同志期
公歲一集青原以為常而公忽已矣嗟乎豈不悲哉公
永豐層山里人也諱汝霖字某號一厓上世自唐監軍
公來鎮永豐子定功贅石橋吳氏為祭酒博士徙層山
代有聞人侍讀公某淄川令伯庸其最著也高王父某

曾王父某父中軒公諱某以公貴封吏科左給事中母
吳氏封太孺人嘗夢神人指一星曰此汝子汝必為貴
人母及公生果有奇表父老覘曰是當後吾鄉文毅公
矣文毅公者羅先生倫也公稍長亦挺然以自任曰不
者非夫也試有司日未午呈所為文邑侯臨海周公奇
之再試賈生論立就數千言益大奇是年補邑博士弟
子員大司馬聶貞襄公覽其文喜曰是郭氏千里駒也
一時名士如羅艮山陳視軒宋華陽鄒六華皆相與推

許日礪礪作時義非其好也則時時從貞襄公問學及遊安成鄒文莊泰和歐陽文莊兩公門曰吾學豈以舉子業羈紲哉嘉靖庚子舉鄉試癸丑第進士授行人司行人久之選吏科給事中上平倭十議一海防二兵衛三選將四練兵五器械六招募七專任八號令九團結十糧餉又上疏極論邊防時務在廷避之巡視皇城中貴人知不可犯不敢私役一軍比使琉球轉刑科右給事其使事本末具使琉球錄及前敘述中公之始抵閩

也與副使李行人某例各造一舟費不下數千金公曰
合舟則費裁而力協李君從之人莫不稱便踰年公至
琉球成禮中山王饋裘蹄黃金四十兩皆作書辭之彼
國法司等嘆曰天使守義峻矣不可再辱越四年復命
而琉球亦遣使臣謝恩具疏言公辭金狀上益嘉悅因
命使臣囊金歸而特賜公白金十兩紵絲一表裏陞光
祿少卿改順天府丞于時朝廷軫念通州倉儲出內帑
勅公督脩通州灣城議者非二十萬不可公力裁之費

止二萬五千有奇六越月而工告竣人皆奇公公曰凡
工踰期而溢費者弊在中官與吏胥乾沒耳第能禁中
官清吏胥則事就易矣一時咸稱名言蓋公不令以一
蔬一糲出有司則身範嚴也工部上公功詔陞公俸二
級是秋提調順天鄉試士論欣服謂得大體嘗攝府尹
事吏白有羨金例請受公盡却之獨念畿輔累經兵火
邑里耗甚乃具疏請發內帑以賑貧窮寬徵徭以復轉
徙上嘉納行之尋改大理少卿暇則集四方同志士講

學靈濟宮往往有所發明聞者羣相稱曰實學信固在前矣公天性孝友出使語人曰吾身已置波漂矣惟念太夫人不可置既陞大理力求歸養當事者知公意篤請於上補南京太常卿便迎養公因取道上觴太夫人稽首從容言迎養事太夫人性甘里居固不往公益鞅不自愉明年上書乞致仕詔可適太夫人已八十公敬養盡歡踰年疾終殮祭盡禮已乃率諸族人修廣層山祖祠既屢火屢新之少不營生產既貴祿足貸人不

為督償異時答太守張公訪邑利病條具五事邑人賴之疾革語不及家第語二子曰和以睦親無忤謙以處已無亢儉以制用無侈不者非吾肖子孫也又語謝君為我謝同郡諸公相見無期惟共力所學嗟乎公於死生之際視世之沾沾者何如哉公生正德庚子三月廿日距終時得年才七十有一娶丘氏繼宋氏又繼王氏俱封孺人子四長奐臯丘出次奐禹皆先卒次奐伊太學生又次奐龍王出孫男四人某邑庠生次詵次謨次

詔曾孫男二某某曾孫女一夫公之自貽與天之祚肩
於公不可謂篤且繁哉公所著有石泉山稿航海漫稿
使琉球錄行於世又有古文奇矩古文亟要詞苑倫英
自省錄志學編凡若干卷銘曰

疇駕天輪鞭長鯨浮乾浸坤靡有驚壯哉夕郎膽貫義
不辱帝命洵上士京兆一疏瘵者蘇學道愛人勢豈紓
巨節細行世莫咸唯公邁種力彌兼言念壽母懸熊車
高堂豈樂潤里間於爍景星焱黯矣胡啻有穀貽孫子

雲塘郭公墓誌銘

郭為予邑南故族蓋昔稱汾陽後宋時居層溪里父僅
子美之同計偕仁宗改僅為佺誥曰卿父子同登名冠
朝廷邑人遂改稱冠朝里公大父一先號唯齋父公域
號西坡西坡公壯未舉子唯齋公風置妾西坡公曰士
無曲妻曰是矣乃令歲蠲穀可五伯石頒族里毋收責
為後嗣地乃舉公請名唯齋公曰奇美後以避四世祖
集賢學士諱易曰奇士唯齋公嘗立諸童孫陽擲金錢

散几上而入衆爭匿金獨公鵠立亡匿意公出曰若匿金不曰未又問諸立者於公亦曰未唯齋公心大異之曰是兒不貪妬若此束髮學易于劉鐵心先生孫公杰唯齋公乃繕其先世故學士讀書臺居公弱冠補諸生又易名彥即能輯郭氏譜又議新祠屋祠址故隘僉欲得公旁便地拓之青烏氏曰是地有吉氣築居必大若後公曰大吾一家孰與大一族乃力請西坡公捐地計若干丈祠成又以義起推祀始祖中丞公因定祀儀作

孝思錄年踰強仕以累不得志亟麾舉子業曰吾將老
雲塘矣遂號雲塘居士明年輸米如白門大司農顧公
故善公謀米入府軍後衛衛近輸省耳掾誤亡後字悉入府
軍衛費倍顧怒坐掾償輸後衛不贍計鬻子公不忍乃
仍自入後衛米主廩者索羨公與之羨及見公禮于大
司農歸公羨公竟與歸者既歸讀孟子曰人皆有不忍
人之心遂建有心樓大究百家著甲子紀元天文地理
禽書各二卷官制四復著韻海卷三十嘉靖辛酉閩廣

寇至走萬安寇燹其廬諸書火者過半所不罹者選擇
一覽四卷韻海已亡五卷里中有暴子弟樹黨將從寇
人訕訕公率里中受憲于部使者約法重捶殺之自是
夜扃不闔衆有欲抵偷兒死者公竟薄治其人乃卒改
行汪忠愍公死寇後宵有物嘯號里大恐公曰鬼無歸
耳明日文祭汪公及諸死寇者嘯頓息蓋公方物策事
多中情迄不處賢而自與雄故鄉人藉藉倚為里君寇
平率子弟省諸先冢勒石置田曰幸哉墓未踐傷松楸

未薪也圖錄紀之初西坡公沒公自粵步跣奔喪哭毀
既葬巷口遂廬巷口書院後母蕭孺人卒亦廬傍舍咸
三年二弟求分財田舍取下劣者其美好默遜二弟晚
從子豪奴誣公于獄事解家益落乃盡發所藏書課諸
孫曰吾產在是然公已匱而好行德愈甚里疫大作途
死者駘藉公悉藁葬之又為竭力賑救身竟無恙駢會
郭卿者涉河亡五十金于河壩詰朝索金不得將自沈
死公呼而還其金邑大夫浸聞高公義固以例授儒官

賓飲澤宮先是公夢負弩矢從東方射日懷而歸筮得震公曰冢子象也果舉今潮州守子章絕竒愛之故廬鳳尾草燬已七年忽挺生公構瑞草亭曩所拓祠前方春四柱皆華公意兆在潮州時潮州以貢赴廷試居第一登順天賢書明年舉南宮官建寧公悅移書誨曰儉成廉學成政力勉之萬歷癸酉正月寢疾手義穀記疑譜各一冊附寄子章成吾志夜語諸子姪曰人言將死有異我無是我死有家禮在慎勿從俗又曰吾忍死須

與遲建寧使者來果來進問狀屬力脩集賢世業名世
端坐卒距其生弘治丙辰四月天年七十有八配曾孺
人前卒男子二長元鵬次元鴻以子章貴封南京工部
主事配南溪蕭澗松先生孫女贈安人子章母繼羅氏
又繼劉氏女子一適蕭乾岡孫男五相甲娶歐陽氏俱
卒相乙字子京禮部儒士娶王氏繼劉氏相奎即潮州
守子章也娶蕭氏封安人相朱天相禮娶張氏孫女一
適曾碩應曾孫五孔簠娶蕭氏孔建聘刑部郎中張公

敏德女孔延聘廣西按察司副使彭公應時女孔太聘
歐陽文莊公孫鴻臚寺序班宗翰女孔陵聘楊文貞公
孫浙江按察司僉事寅秋女曾孫女三工部君將以某
年月日窆公某山某向之兆以潮州遊余門屬為銘余
嘗讀潮州所為編年而知公六行與六藝之兼備也為
之銘曰

孰濟其先亶集賢之名閥嫣然孰繩其後亶潮守之文
采翩然於鑠雲塘上則懿孫下乃文祖不為長河之沛

胡停涵為沱瀦不為應龍之升胡澤霧為豹武洸洸乎
矯矯乎將導為溟海翔為靈雨不在其躬在後衆甫踔
潮守兮前鋒而鼓

亡友月塘曾君墓誌銘

予少即好友奇節士得予亡友月塘曾君君自舞象之
年已與古人期既壯偕予事歐陽文莊公問學又結五
人會當時已欽君德範又善亶亶忠告會中無不折服
唯君聽予益兄事之嘉靖癸丑予上春官適君教文莊

公諸孫寓京予方仰祿為養屆期猶豫君為起擊案曰
若為養乃不自果是不子也予俛而受官退乃思曰非
君疇則成我比君卒歐陽生為狀令予銘後幾何年歐
陽生繼卒又幾何年予尚未銘也予其忍後乎其亦有
待也今予年近髦於斯學粗有辨乃取讀君狀追而誌
之誌曰君諱于乾字思健先世居邑文溪徙月岡自士
俊士敏始俊再傳勉訓公生松坪翁才冠領正德丁卯
鄉薦掌教金壇母蕭孺人有淑德君弱不喜弄韻嗜誦

書一過目不忘縮髮操筆成詩題二鴉翁奇之已而從至金壇檉庵王公烜在諸生中才而寡翁為館穀與君同硯席數年時王公雖最稱敏不能絕君也君博涉羣書至廢眠食為文左國六子漢魏無所不之癸未翁解組歸微疾君左右養不解帶翁出藏金授三子盡讓伯兄庶弟與同舍生會課一日撰三場若夙構娶康氏仕族禮成半月謝不見客人頗訝之及出所草管議二卷非非國語一卷禹貢簡傳一卷士友傳誦爭異後翁疾

篤多君讓金義出券若干曰以償汝君掩泣祇受竟不
取償尋值大故堅執喪禮養蕭孺人尤曲意庶母庶弟
督學范公選補邑庠弟子員首多士至是邑人士指目
之曰是嘗一日課三場讓金而不肯誅券者其學行詎
可犯踰冠愈端凝四方爭迎為子弟師道賴會關以譏
私鹽久閉糴亦隨阻吉人仰食于賴嗷嗷然咨于君也
君抗書謁督府錢公讀其書萬言至屈禮延納開闢通
糴諸鹽賈循故事斂厚貲納君君弗顧邑侯陳公有威

嚴與庠師貳且欲危庠士衆咸避鋒君獨立堂下折數
言陳莫孰何士氣為大振擇庵公司理吾郡下車拜翁
墓登堂奉蕭孺人如母驩然道故竟無私謁時抱重獄
千金求解者盈門竟不可至為雪雷丞誣及楊氏冤擇
庵公奉若神明而雷楊弗知也蕭孺人喪忍死襄事興
邑盧侯雅慕君行誼聘修邑誌君亦重盧為往誌成不
溢美不隱惡人咸服良史才維舟螺川夜有持囊金納
君袖倉皇去怪而俟之爽日囊金者至曰幸公金得不

奪願分半為謝君不受詰之曰子非故而託金謂何答
曰小人視公狀廉士也竟不得申謝祝天叩首去壬子
秋君以歐陽文莊延禮居京師朝紳及四方名流刺滿
戶外欲覩君面不得伯兄性嚴急事若父兄卒撫兄子
如已子庶母沒撫庶弟與庶弟之子如兄子嘗偕從弟
澧州學正今中丞諸君合長少議創明裡堂又欲本歐
蘇法為譜建家塾羣族子弟胥教以廣冠興未逮也辛
酉大饑請發廩不報乃出已貲周本支及賑里中貧督

學廉德行必首君嘗謂古道不復卷卷以正風俗成人材自任從臾從叔松山封君雙溪少叅二公申訂羅文莊公雲亭鄉約鄉人尊行數十年以故雲亭視他俗稍美羣從有文者鄉有識者莫不師視大過失不願聞君及門凡百餘徒多不遠千里來君少尚氣槩讀書見烈士獨行輒義形于色見不善若浼已晚更為平友朋徵詰奇文與字君語必詳卒無伐意有過未嘗不引義然飲人和人雖敬憚又莫不信愛焉對妻子僮僕甚肅而

不見怒容厲聲郊外緩步如委蛇室中既訂五人會鄒
文莊公引其會籍歐文莊居宮端聞之示以知方立志
皆首望君最後念庵先生延教子處松原蓮洞者六年
雅曰予從是畢志斯學即終身焉可矣壬戌九月約諸
同志趨松原求訂正不謂君遽以是月七日病中風卒
于松原里第先生為痛哭具檯斂摘詞以祭致重語訃
逮邑中識與不識無不悲愴直時寓湖北歐陽生書報
乃為位哭若不知慟所從也距其生某年月日得年才

四十三歲己巳邑士彙君異行陳諸督學使者乃列祀鄉賢祠大夫士聞者鼓躍若有勸焉且曰月塘君雖未仕官其視仕官而未能蒙俎豆其間者以彼易此其所樹豈不遠哉己卯君仲子仲聲與計偕乃邑人士又相與嘆食德之無既也子二一鴻庠生娶某氏一鸞即仲聲娶某氏孫某二孤以某年月日厝君某山某向之原殆今墓木拱矣一日同會友王有訓謂直曰或有疑君布褐士不宜埒仕官者並蒼蒿也予曰噫鄙哉言乎夫

鄉賢者為閭巷砥行足勸也非以爵位為進退也今不爵位而祀不益觀公評乎乃反謂非宜左矣嗟夫君窮而早殞天也假令君而獲立文石出入乎禁闥則汲長孺之慙不阿也夫孰與君令君而綰符握篆宰一邑一都列乎岳牧則龔黃之循政楊氏之却暮夜金也夫孰與君令君又進與起居注則杜楮之君舉必書也夫孰與君此非臆與也以君操執已然者可槩驗也矧君學幾自得祀不祀又曷為有無而世之勸于君者則什伯

乎尋常矣詎曰祀非宜予既以是解或人之非所疑也
因綴諸誌末不獨郭有道不慚予言而予至是始不慚
有道也遂以是銘墓

山陰陳雲谿先生墓誌銘

往紹興諸太史為言胡總督鎮浙時怙勢樹黨境內同
年第者朝附門夕可磊千金產一時遂為風靡獨其邑
陳雲谿先生不可招既強致一拜別迄無請問語斯非
吾邦遠偉丈夫哉胡子曰予知先生偉若邦而未知其

偉斯世也先生昔宰予鄉之分宜會今柄臣父子氣焰
方灼即八座握銓大吏已順指若舍中兒其舍中兒出
如建索緹騎靡不辟易先生之始下車也乃令民曰予
受命為茲邑長若圯度干憲養蠹豐苴予固弗敢其或
附麗炎要從臾其私人為若庶草毒則亦無用予為也
若等其毋自貽咎咎弗在予于是聆者凜凜趨繩約而
柄家人故自挾唐突來見先生直奴畜之有犯輒撻治
弗少貸柄家欲有私干禁弗敢出口人或危之先生屹

弗以動不穀直嘗至分宜見分宜人曰方是時有督學使者乃與其舍中兒均禮至為生童行闕說視先生何如哉又曰先生英敏絕世事至輒若觀火聽斷如流庭無逋事四境細民一詢姓名不忘初試練若老吏大小躬裁吏抱文屏立廡下若土木無敢出氣一時例賂為洗民間有公門如水之謠邑賦故重有點胥習為富戶嫁稅貧民坐致殷富人莫能詰先生廉得其情箠殺于市乃遂稽研故籍釐正分數時斂平衡盡塞其弊孔民

皆歡欣出賦不越期而輸自竣劇盜張安邦乘公出劫
帑攫金既旋偵知縛至戮之自是盜絕庚子大饑穀價
翔貴先生賑散有法又平糴勸貸所活至不可算既蠲
租詔下然有先輸匿里總手者先生嚴示立令給還民
始食實惠邑為孔道供張僮騶費不貲先生悉取而令
甲之節靡裁濫以身率先民大蘇息然其心要為民樹
長利若厚士興文禮賢易俗葺黌宮飭公舍完庾藏繕
杠梁輒曰有司分也咸以次舉先生莅政急民隱明治

體固如此此豈可與沾沾譚譚者比哉乃其竟事未嘗以隻字尺幣與柄家相問遺以是柄家銜次骨歷五歲臺臣交薦循廉為天下第一癸卯以內召應補要職柄家乃抑授南大理評事又令人陰伺欲讎之時先生讞獄亭疑又赫然有聲更五年不得逞已酉遂陞廣東按察司僉事是歲仲冬先生甫臨任次年首春以覲察罷去公論為不平然雖譁而靡敢言若先生者所謂終始秉節連連偉一世者非與諸君相與嘆曰嗟哉偉人偉

人蓋先生以庚子與江藩外簾適閱不穀直三試卷辱
繆題曰是將與賈馬爭馳驟者然竟不錄先生譙讓不
已監臨者雖直其言已無逮矣不穀直舉癸卯先生仍
在場既見喜名薦猶憾未冠先生愛才至篤切然而不
穀直非其人也自庚戌到今壬午先生家食餘三十年
不穀直雖登仕然靡足為知己報稱亦既碌碌伏林莽
先生冢嗣某犇數千里踵門告曰先生先年辛巳某月
往矣遺命誌銘屬子又示以新喻張翰林所記分宜去


思碑不穀直拜受相對泣下讀記首曰毀譽之興如沸湯故聽者淆是非之定如止水故傳者信蓋記作于先生去任二十年後諒哉所謂止水評也然不穀直聞南北有事時歐陽冢宰握銓遴才難其人仰天嘆曰得一陳雲谿足矣寮屬愕眙問雲谿奚在公曰是人以不諧時去久矣聞者益用為詘夫為政可以取大吏當前之遇不可以得丘民去後之思可以致有力九遷之榮不可以徼無意一言之重可以賈虛聲于崇朝不可以永

實譽于異代此其得失多寡世必辨之矣先生諱鵠字
某別號雲谿世為山陰人生正德己巳某月距其卒享
年七十有一初娶吳氏封孺人生女一適庠生何景賢
繼朱孺人生子四長即大縉太學生次大統以明經第
甲戌進士令景陵能世其循政次大綬大綱庠生側室張氏
生子二大纓大綺縉娶潘氏生子二昌言鼎言女一適
某統娶胡氏生子二法言巽言女一適某繼花氏生子
某纓娶高氏生子三可言正言至言綺娶梅氏綬娶周

氏生子某綱娶汪氏天於先生不膺其位而昌其嗣可不謂既定而勝者哉是故叙其事可為官譜表其人可為士型獨慚不穀直言不足行遠而先生固有自不朽者存異時傳循吏者其又誰能刊之為之銘曰

洪河天倒滂濞訇激匪罌者石疇為中屹嚴冬冰雪凌弭摧擊匪喬者松疇獨秀植於惟先生稽山構貞際彼昏寐操柄以傾大吏既偃小臣若崩曷帝洪河水雪峻嶧先生挺挺獨行其志倨百里長抗三公貴黑蜥玄貍

禁弗得氣發摘拊綏迺曰餘事休而懸車耶水之側垂
三十春畔世弗屑邑懷其循朝思其傑芳猷穹碑百代
攸煜曷啻碣石嵩松飛節諒哉循良灼爚史牒矧曰天
定奕奕後哲彼昏者徒腥穢萬葉



衡廬續稿卷八

欽定四庫全書

集部

衡廬續稿卷九

十

詳校官監察御史

臣陳化龍

侍讀

臣

孫球覆勘

總校官編修

臣

倉聖脈

校對官中書

臣

高中

騰錄監生

臣

姜樹

欽定四庫全書

衡廬續稿卷九

明 胡直 著

墓誌銘

曲江蕭處士墓誌銘

予昔為郎時同里蕭令尹永陵以謁選晤都中覩其人
挺身靖飭詢知為曲江公子曲江公吾先子宿與也益
起敬焉嗣聞令尹嘗典教常熟而從兄教授武並時教

江陰相去僅百里迎養曲江往來二邑間嘗乘畫舫徜徉倡和遂成帙集適七旬士大夫觴詠慶祝縉紳榮之予亦嘆羨慨予先子早世未逮也今年予自蜀解文衡令尹以兄式所為曲江公事狀謁銘子曰是世誼何可辭按狀公諱籌字充猷號曲江其先宋大理評事德寬公由吉水之螺陂徙居泰和之祿岡螺溪自大理而上遠有端緒九傳至誥封工部員外郎璉是為曾祖生尋甸太守公集號半菴生邑庠生絢絢生四子公其季也

公少敏有巨人志以詩補邑庠弟子員天性淳懿不事
華好平居務繼先志事父母善承顏色惟意欲為罔不
殫心生事塋祭要不詭于禮奉母嚴孺人尤謹事伯叔
父猶父也未嘗先以賢智訓子姪義方曰汝祖半菴公
豈獨甲第顯乎其清白足傳也以故令尹與教授有聞
時里人盜塋德升公墳側又侵大理公塋公毅然率子
姓白于官竟抵其罪而墳無毀中年承詔例榮以冠服
遂絕舉業行吟江滸之間意泊如也娶唐福黃氏繼沙

隴胡氏咸守公家範男五人長曰崇即永陵附籍楚遠
安以貢擢常熟隣水教事陞尹山東莘邑次崑邑庠生
次嶺例受冠帶次巖幹盡克家次葉王府典腆俱黃生
孫男七某曾孫男十一某曾孫女二距生成化丁未十
二月初十卒嘉靖某年月日享年七十有九茲卜塋于
本里丁山癸向之原塋之日六月十九之吉也嗚呼公
可謂不忤世德而奕奕有貽穀矣于是乎銘銘曰

承先不忤豈曰其贏貽後有穀豈曰其榮卜兆厥里曾

孫伏臘起步林林千秋萬歲誰哉侵

上林苑監署丞平溪王君墓誌銘

王君諱一覺字智卿號平溪蓋諱貞譽恥齊公仲子也
用王父命後太僕卿諱貞吉修齋亦仲子少治易嘉靖
乙卯補邑諸生戊午為太學生辛酉例授上林監署丞
待次給假歸養歲庚午部檄當行君不忍去八旬親留
家食侍修齋公若干年乃後修齋公天年下世服闋萬
厯辛巳始謁選都下今年六月上林苑署丞員缺將實

授先二日暴病竟卒嗟乎始擢選而以親故不赴甫選而輒以疾奪且死其命也哉其命也哉君體癯若不勝衣然天性剛耿不設城府見者接容貌聆謦咳已覩見心腑矣既後修齋公生能養卒當大事無弗盡誠信而及恥齋公夫婦之卒塋亦無弗如事修齋公者王氏出後能兩盡子道謂僅見君上世塋為勢力者侵奪君奮發倒私索協族人理之族之人數萬指莫不指目君服其首義其它周所識寔無為食鰥無為室者凡若而人

廬陵太學生段某同舟疾疫從者莫能興君周旋其間
不因人言自便卒亦亡恙識者高之族里有爭君毅然
指曰若直若曲若可若不迄無吐茹態以故善者悅其
直即黠者無怨也予雅遊修齋公公篤信古人之學君
從父貞啓從弟一俞世其業而又皆善予予嘗辱挈登
斌姥講業虎鼻龍洞之間君聞有味乎其言退自感發
恨得之晚告其族姻曰不學詎可踐斯人哉於是延知
學士訓其二子必隆禮際腆餽餉故二子亦蒸蒸期上

達衆誦君遺子以善不以金諒哉蓋君淵源先世又嘗
從其族祖南巖大夫學而浸潤者非一晨夕故君之履
以孝為根幹其趨義棄利如此咸非苟而已也君生嘉
靖壬辰十一月卒萬厯癸未六月十五日年凡五十有
二母梁氏封孺人前母龍氏周氏贈孺人本生母郭氏
娶張氏水部玉屏公姪女子三萬咏邑庠生萬瞳業舉
皆有雋才所謂蒸蒸期上達者是也萬曜庶母出君方
強仕即營壽藏於五十九都剛角之原逮今十餘年驗

視之吉將以某月日厝君于斯而以南巖大夫狀來請
銘銘曰

彼其之子絕裾呈身曾不如君部檄臨門而留以親彼
其之子持籌課利曾不如君倒橐靡時而急者義豈不
悲哉臨銓告殞一命未歷孝實為之匪天攸抑旅囊既
匱孤櫬蕭颯義實為之匪人攸厄爰悲爰繹貴弗以祿
壽弗以世天定報章有燭其嗣剛角之原以延萬禩

楊母蕭孺人墓誌銘

楊母者楊仁叔母蕭氏諱曰重闕出南溪故相尚約公之族父諱其陶號履素有行誼嘗出身濟公家事寓上都拾金索金主還之主剖金贈謝不顧已而受冠服所至稱長者取周氏生母母自童靜重勤女紅年十幾歸贈君贈君諱紹祖字善卿號慕雲故相楊文貞公六世孫以仲子義叔貴贈文林郎時大母王孺人孀居治家嚴密有灋度母方穉弱輒能躬勤左右理中饋謹出納事事當大母意退食糲糲服漸敝無難色大母憐之大

母病母晝不安坐夜不寧寢手調藥餌食飲亦無倦既
大母病愈而母疾作矣大母憐益劇藥餌食飲亦若母
事大母然大母故禁巫至是百求禱掩涕呼天願留新
婦已而母果愈乃竟以產難不復起大母哭幾絕月餘
廢家平時憶思詔其子寅春曰爾不自樹曷慰我與而
母地下哉言訖涕零零下母宿嗜蓮房忌祭輒辨以羞
嗟嗟乎非母也誠孝曷以致之故中外莫不悼傷曰孝
婦逝何遑耶時王貞穆先生倡學於家贈君為其甥嘗

左右之子得友貞穆遊於君習母事屬者仁叔游子門
泣請銘因撫其大者為銘以傳母生嘉靖辛巳月日歿
嘉靖六月十四日得年二十有四男三長寅春即仁叔
母所出也次寅秋即義叔第甲戌進士令東莞縣次寅
冬女一適上舍生胡起鳴俱繼母蕭孺人出孫男六某
某孫女六母塋清溪園某山某向銘曰

為媚無曰幼而孝靡右為母無曰歿而肩孔厚需樂丘
兮永臧衍千禩兮百昌

誥封周母王夫人墓誌銘

夫人王氏諱某生吉水花園里右族上世徙自臨川世有顯人父二池翁某博物君子也早著聲邑庠間母丘孺人夢仙女導從被九珎服下臨卧內遂舉夫人夫人自童靜慧端莊方三歲時王氏一夕罹巨盜闖入獐甚會丘孺人病艱遠竄皇遽挈抱夫人匿舍傍委巷中幾不免矣忽覩兩紫衣人遮蔽寇不得見既去丘孺人以語翁翁曰異哉此女之祥曷不為丈夫子樹吾門耶稍

長嫺姆教勤女紅敏絕人翁為擇對適周簡肅公前熊夫人逝耳熟夫人賢聲懇翁特篤遂許配歸時方韶齒熊夫人已有子女各一咸稱夫人鞠若已出先是公在諫垣疏請復王新建伯爵忤旨謫太倉判後移宿州夫人始從宦時公家故窶而操獨嚴夫人躬率績紡佐費常食脫粟半菽無不忻忻及行每見途市中餓殍必令家僮予食飲或授之衣賴全活者衆既公參粵藩遷憲司副使邁諸寮婦宴會諸寮婦衣飾爛如夫人以布素

列坐迄無自嫌意及公歷參政方伯俱在閩中夫人未嘗一歆艷閩物故公獨以官望著稱上下丁未公入覲尋陞都察院右副都御史撫應天明年總督兩廣都重鎮而夫人猶衣不完綵食不常珍自視不知有異庚戌公以三品滿封淑人是年轉刑部侍郎出掌南臺頃之為南冢宰改南兵書夫人禁約內外如曩時立二子膝下時訓之無乖時蹈機利溷若翁清德戕若家慶小子誠之未幾公以簡命為左都御史掌內臺是時廢臣席

勢擅魁柄頗指諸大寮無弗應者然每有關說逮公公
不為應廕臣銜公時時陰令人偵公短長為甘心地夫
人聞益約束僮奴絕外交偵者連歲竟不得隙於是廕
臣父子咸嚴重公不敢以私奸朝臣望公若霜雪之獨
有松筠也其賢者倚以自樹則夫人之助翊豫矣繼公
二品上績晉封夫人自夫人之歸至是垂四十年篋中
唯一鳳冠及被袍其它無希奇之服是歲前室子守謁
選為中軍都事夫人諭誨至於泣下明年守感疾不起

夫人痛哭連數月不解少間則謂公曰守不祿妾不若
携幼歸理家政便既歸歷數千里越百驛餽遺一無所
受底舍隣婦走女奴候訊會夫人仍被布素理庖事輒
問夫人何在夫人曰固我也女奴不謂然而家人喻之
乃縮頸咋舌曰甚哉夫人儉德固至是耶蓋是時郡邑
風習稍變閭閻咸以璣翠綺縠競高而夫人獨守淡約
無貴顯家氣聞者嘆曰是敬姜再覩矣一時閭閻侈風
為之少息某歲公薨于位夫人聞喪哭欲絕者數矣族

婦勸為弱孤計乃稍近食飲已而訓其子宣時舉公生平與古人行事督令服習不則繼以聲色至宣納婦訓尤厲久乃授以家政性喜周貧有叩為倒橐恐後待中外昆弟子姪有恩庚辰冬夫人病偶作遂不藥病革執宣手訓曰若考官中外四十餘年清德為朝野推高汝其勉承無貽九原戚言訖呼諸婦櫛髮甫畢端坐而逝時十一月十有六日也自其生弘治壬申某月日享年六十有九子二長即守中軍府經歷娶張氏次即宣太

學生娶楊氏女二長適庠生羅思與守俱熊出幼適太
學生李祖庚孫女一許聘庠生曾復亨夫人出也夫人
生平間模與公官箴家範相伉儷終始如一日今宣卜
以某年月日奉厝某山某向之原乃撰次夫人事蒲
伏百里外泣血請銘于予予往在都辱公知誨又其姻
家中丞曾公予篤友也恒語夫人懿德為里中內則欽
風非一日矣不辭而為之銘曰

翼翼簡肅握憲先朝有竊魁柄乳虎離島迺羿迺浞如

沸如蜩公獨正色式是百寮如魯靈光巋立弗搖彼狂
雖鷙貌靡敢驕群彥倚公如倚嶽喬狂欲虺噬靡隙以
招孰其翊司閏德孔昭偉偉夫人天植不佻勤朴且惠
閭井世標甫傳而逝徽音則遙天胡埤之肩也秀翹我
銘茲宅百世一朝

尹蕭兩賢婦合厝墓誌銘

某年月日歐陽子將改二亡室之塋而合厝之因手其
事狀授親友胡子委之誌銘胡子曰是嘗聞子師所稱

兩賢婦者銘詎可謝耶兩賢婦其一尹孺人諱瑞蓮出
灌塘名族初母劉有身父松岡先生夢巨人履空昇彩
障張樂喧填降止其家就視絢爛金書有字曰尹氏瑞
蓮已乃得孺人故名正德甲戌五月九日也年廿歸歐
陽子又九年為嘉靖辛丑十一月廿一日以免乳卒年
才二十有八孺人始至能期歐陽子貌榮名為姑執勤
雖夜不休方未乳時會襄大父事劈畫督辦往往決曙
又喜浮屠法不肉食用是益耗憊臨絕泣曰吾憊矣死

無憾獨憾弱孩累吾姑子二伯宗符邑廩生娶胡氏仲
宗翰國子生娶張中丞女生子念稼二女適京衛經歷
王良鴻國子生王良懷孺人亡時歐陽子年未及壯卜
繼室得蕭孺人蕭亦寧村著姓父時滔母羅氏以嘉靖
丁亥六月廿六日生孺人名曰秀蘭行曰六娘歲癸卯
歸歐陽子雖在冲年撫前室子絕慈御下不施鞭箠咸
廩廩趨令方產女女死而身繼之其前子女號踊索母
啼甚由是王姑蕭淑人姑康夫人咸酸楚痛之翁文莊公

自撰文令猶子代為奠其言曰吾哀其賢而不永諒哉其賢矣夫歐陽子又雅為胡子說曰尹性婉惠蕭敏給然咸仁孝儉勤為門內嗟思並長富室而咸恬簡素並有丈夫幹蠱才而咸無自擅之意痛矣吾兩得之而兩不吾偕今將合厝某山某向之原乃吾益思悲焉吾家自先公以下非子莫悉也子其表著吾二亡室事毋讓胡子于是系之辭曰予師文莊公海內競相宗依恐後者也而兩孺人父之子友歐陽子學道有文天下名賢

相屬繩武于公者也兩孺人君之符翰二子嘗從予予
稔其國器也兩孺人母之豈當時所夢金書之祥固在
茲耶猗三娥兮儷德慰合窆兮與與過從慶生前兮遇
同篤後祐兮靡窮萬有兮千歲偉封鬣兮隆嵒

誥封賀母周宜人墓誌銘

曩予交心泉賀大夫于官已而遘冢嗣學史君覩奇雋
知象賢有自矣而其從父少龍憲伯則曰予嫂氏周宜
人乃亦有內則焉鳳陽賑饑之事此嫂氏畫也今食其

德矣萬歷庚辰月日周宜人棄世去學史君卜某年月
日奉宜人從大夫窆某山某向之原乃躬扣予山樊手
憲伯所狀行事屬之銘予慨然曰不佞習宜人行事舊
矣矧辱世講義無讓按宜人出林原右族父周長者某
母某氏以某年月日產宜人自童端淑長者異之數謂
所親曰是詎可媿凡子賀大父莞溪翁聞乃遂為大夫
委禽焉年十六歸賀氏大夫方業文弁髦生產家故價宜
人輒能勤女紅佐家費大夫舉甲午鄉書連上春官未

第宜人始以親老祿仕諷謁選為鳳陽學正頃之鳳陽
歲大饑宮傍殍相枕生者竊相啖以苟活宜人聞之輒
蹙而告大夫曰鳳民至是即寒官柰何可坐視乎于是
謀易粟人粥之繼而粥者至數百人又至千人虞弗給
乃盡鬻釵釧及別貸累日夜所活至不可勝數至今鳳
民歸德賀公乃不知贊決自宜人也三年大夫擢令太
康退食從容諷曰側聞痛楚聲得無桁楊過乎願少寬
之繇是大夫益省刑贖以賢聲著則又勸置側室張以

廣嗣生子女鞠若已出自大夫宦遊一切家務屬弟而
宜人亦以間寄屬弟婦至妯娌姑姒咸能身下之常容
人所不堪大夫欲均已產于弟力贊就之乃呼學史君
諭曰非若母安能成吾志頃大夫自龍陽令遷守威州
威遠在西徼外念二老親不忍行宜人勸曰君受寄邊
城乃不肯窺左足動者知非以遠憚也意者為二老親
然締觀二老親翔健善飯吾保任滌灑矧窺二老親肺
腸戚君弗往往而得封章以償生平其視錄錄膝下不

尤快乎大夫感其言涓日行又更為置側室王偕以往
踰年大母病宜人偶旅床第間至廁踰或躬滌浹月餘
蓋未嘗釋衣而寢安坐而食也深夜獨屏息稽首籲天
請身代大母病革前宜人曰若賢孝乃爾願我它生為
若婦如若事我今已矣聞者愴焉已而大父繼病宜人
翼翼心相語曰夫不欲行我故強之乃有今日彷徨達
旦以身禱于天曰是咎在我願隕我身貸我翁遲夫歸
然大父竟弗起鄉族聞者為酸鼻曰賢孝賢孝大夫歸

泣謝宜人曰微子吾罪戾難言矣亡何學史君登第
初除漂水令取道迎養宜人輒訓飭曰廉明若世業也
若欲為一身祿養孰與以一邑賢聲養矧若父故倦游
吾難獨往行矣勉之已而果以上最擢臺史乘傳按晉
辭于家宜人泣送牽裾曰往聞繡衣使蒞吾邦盱衡間
已若摧山嶽奚止管蒯民命已哉願勿似之則又屬從
者到部中申囑戒暴無輕用重典即我日坐邸第羞五
鼎不啻也學史君服膺名大起迺即以才御史受簡督

北畿學宜人又申囑戒無枉士如前語學史君繇是造
士益力旋膺察舉為天下首冠隆慶庚辰上覃恩以夫
階封宜人宜人既鳳冠霞帔珠燦珮鏘爛然榮也處妯
娒間愈姁姁不勝衣適鄉閭旱荒宜人曰吾昔不忍于
鳳民今寧忍于鄉之人乎乃出學史前後寄養百餘金
悉令人買穀分濟里民負穀載道競相呼曰宜人生我
里有上觀橋圯久病涉漲則漂溺不支宜人倒橐金百
餘鳩工橋之里人為樹石紀其事又橋螺岡田坊凡幾

所一日郡宅火惡少乘劫空其帑藏已繫在官宜人弗
豫者累日曰是天災也乃竟貸惡少勿問平時見寒饑
者必謀與衣食病與藥喪與槨有急稱貸與應貧不能
償者無論子錢即母錢無問也晚乃取積券可千金火
之其素所自奉雖褐布粗糲恬如也病作諸婦慰曰冢
君旦夜且至瞪目應曰無乃差使至耶已而果然人咸
異之既逝距其生正德七年十二月十七日享年六十
有六鄉族悲慟有哭至失聲者咸曰失賢母矣嗟乎此

豈一食羹足致哉子三長一桂即學史君娶蕭氏宜人
出次某某出夫宜人固羣然閨流也始未當事詩書然
為孝至欲捐身為慈活可千餘人則視世之冠纓業詩
書口仁義者乃未能以涔流潤澤尺寸者何其徑庭哉
豈非其天性獨至者與矧曰襄其夫穀其子允有令名
較論功德可不謂今之女儒乎哉銘曰

大車之將孰云翊之副轄其那太溟之瀆孰云啓之開
先者河鬱鬱宜人抱淑孔多孝腸繚結慈澤汪沱靈修

天至靡事琢磨彼冕者儒慚莫肩何翊維夫子如車斯
載載以令名啓維哲嗣如溟斯涵浴日化鵬禮閭師匠
高門鏡衡生生之德馨聞帝庭帝寔睠之祚肩崇閼京
丘合璧長發其榮

亡妻蕭安人墓誌銘

安人蕭氏諱閏莊出邑茅園巷聯科里父碧池翁諱傑
世系行誼語具予所撰誌銘中母鍾氏生安人敏慧絕
出童時一日覩天門轟闢中有人冠衣偉煜翁聞異之

嘗呵譙富人弗與婚嘉靖癸巳先員外郎晴岡贈君方
為予卜婚而其友曾公璜劉公元語曰婚莫踰蕭氏女
已而聞諸邑大夫成都陳公邑博廣濟文公咸以屬翁
遂委禽焉是冬先贈君背棄丙申予解服乃僦負郭居
畢婚時予斃且窶先世無尺宅儋粟上有祖母蔡太孺
人高年母周太安人孀居下有兩弱弟靡為朝夕安人
愕曰窘至是乎予乃出授徒安人亦漸鬻諸奩具佐給
俯仰而自啗者率半菽間出衣布應二弟束修癸卯予

舉于鄉連弗第往往糧絕至浹旬咸得安人脫簪始見
突烟甲辰蔡太孺人卒安人手嫁時新衣為斂見者懼
嘆生平嫺女紅節縮字畜有方繇是家稍起亦稍贖故
田宅始還故義和滄洲里僅僅樹門戶矣癸丑予仰祿
教句曲丙辰登第官刑曹以三年考封安人于是安人
兩從予宦耳熟兩京國服飾繁麗未嘗從史購一珍奇
物方分宜甚盛居舍右晝夜輻輳請求如響安人亦未
嘗一日強所不可蓋久諳予樸拙知弗可強也予少負

不羈既長折節妄意古人之學安人初弗懌已而習之
又嘗慕尚古文辭故予雖涼劣一時門多偉夫名士車
即舍中罄竭安人必力辦酒漿蔬饌俾予得罄懽以上
下古今為愉快知予志意在也庚申予出僉楚憲駐湖
北安人侍太安人居衙舍尤能嚴扃鑰慎左右故予得
為所欲為無返顧知予意有樹也予既獨身赴蜀乞休
復起宦楚粵先後十年安人家居夙夜纖嗇自喜凡予
所有廩祿帛繒咸舉以拓產葺居比癸酉冬予為太安

人再疏乞養歸視安人布素糲糲猶然句曲刑曹時四方縉紳青衿日見叩者充廬安人治具不皇寢食有昏暮至者輒輟已飯飯其從既終夜而枵腹者不知凡幾矣獨族戚百口莫不誦安人慈濟狀曰匱告必粟餒告必食以莖告必樁有急必應已予訊之則曰吾習子夙懷久矣吾豈不亟承之嗟嗟予謂安人之終不懌耶乃其知予而翼之也類若是丁丑偕予襄太安人事僅踰四年至辛巳之八月邁病九月八日即長逝矣邇其生

丁丑閏十二月之九日得年六十有五嗚呼痛哉子一
某邑庠士配西門張氏女一適某孫男四長士統聘江
口陳氏次士紀聘永新環湖尹氏次士經聘本里羅步
蕭氏次士綸聘廬陵敖城曠氏孫女二長聘柳溪陳懋
會次聘

原缺

今順卜以壬午子月厝于吉水張

渡下流之龍家邊申庚向即予壽藏右方其卜兆始末
詳吉水見臺曾公所為壽藏記中茲不述第述安人生
平茹百艱與其躋行大者用詔後人蓋實錄云銘曰

屹屹乎挈青原蜿蜒而西也水則縈其下沄沄乎導白
下渺漭而北也山則挹其右君歸休兮安以宥宜爾子
孫兮祐孔厚

故太學生陳笑野君墓誌銘

陳氏自先代歷明興以文學甲邑中然未有林林嶽嶽
如尚寶先生盛也于時從子太學君斯一羣從斯道二
三子咸以古文語潤色時義羽翼詞林而太學君尤工
為左國體人讀之誠左國也時人稱曰珠林陳區一鳳

二雛嗟乎盛哉太學君名參字斯一以高祖正夫公從
塔下徙芙塘遂取號曰芙野曾祖某俱未仕祖某以仲
子尚寶昌積貴封禮部儀制司主事行誼著里閭父某
號東洲翁始業舉後修封君業娶白氏獨生君君生而
炯目方頤儀觀偉碩東洲翁奇之猶昔之奇尚寶而督
課殷也撻之血其衣白孺人有慙辭君遽伏地請曰母
無慙父增兒咎淬礪力百之已而從其族兄僉憲公某
學尚書時尚寶冠壬午解試名大起臺司推轂唯所請

意引君游庠校君止曰參必自致身進取不則非夫後
竟以文補弟子員君既優業舉沉酣左國復肆力莊列
太史淮南擷英噉馥鼓舞筆端邑令陳侯讀其卷驚曰
是必嫺古文詞者非經生能並驟也自是為深知當此
時君女弟夫尹大夫仲烈以宏詞魁江介次女弟夫歐
陽文朝文質咸斌斌與君並宗匠尚寶若鼎峙然君屢
弗舉僅僅補增廣生初尚寶念君諷從近例入太學君
固不從已而尚寶忤柄家歸君適赴試逆諸南浦尚寶

復理前語君勃然曰敢不唯叔父命明年秋遂隨部牒
援例赴北雍行次臨清病作竟客死焉時嘉靖丙午七
月日也訃聞鄉縉紳士痛惜之君天性與家法咸篤孝
友翁嘗被訟君請代撻竟得直白孺人病癰君不去左
右藥湯手上不就內寢者終母之身尚寶中危病君侍
疾盡瘁一如侍母異時有傳柄家欲甘心尚寶追正潛
歸之罪詔逮將及門矣君為尚寶分畫扶侍逆使者于
途已而知出訛言而君之為義烈矣故君沒餘三十年

尚寶言未嘗不嘖嘖沾裳也生平剛直面折人過是非
廩廩難犯然好與賢已者為深分才識濟變有餘地乃
竟短世未嘗試一割以殞豈不可重悼哉距其生正德
乙丑十二月得年才四十有九元配王氏文端公裔也
繼陂邊楊氏子三伯貞觀娶王氏繼東城楊氏仲貞願
娶陂山康氏季貞兌娶學後楊氏俱邑庠生女三長適
龍太尹子某次王某子某俱母王出季適蕭太尹子某
母楊出孫男六某某曾孫男五某某女二諸孤卜某年

缺

月日塋祔尚寶瑩右首某趾某尹大夫狀君行謂君存

侍文叔予誌而嘆曰允哉後有過車必且式于兩

文先生墓矣銘曰

符臣咳唾闢瓊圃手披琅樹列采璵庭堦一枝赤英翹
燕壁晉棘難並數風流阮咸豈足言勲業封胡期坐觀
白虹紫氣空連牛三獻不得成珩瑤已矣埋光珠江頭
奇種千歲產琳璆

處士蕭介齋翁偕配嚴孺人墓誌銘

歲萬厯甲戌六月廿四日里中蕭介齋處士逝里人悼
焉越丙子七月十一日處士配嚴孺人逝里之族戚悼
焉又明年為丁丑十二月之十四日諸孤奉處士偕孺人
合塋龍門大坪山首坎趾離少子九韶手其外孫國學
生楊應弼所為狀謁予銘予不得辭按予里中望族蓋
推先蕭氏蕭氏上世自吉水螺陂曰大理評事德寬始
徙予里之祿岡九世至本質婚予胡氏生宜休公器用
仕至廣東按察僉事子七仕者凡五第七子道軒公諱

瀾獨未仕娶柳溪陳氏實生處士諱僖字國和介齋其
別號云處士生質絕羣兒十歲為文有驚人語既冠補
博士弟子員會道軒公下世母寡家累空乏未久棄學
而專修封君業然天性孝誠奉母昕夕定省歲時燕喜
終母之世翼翼愉愉如也每上觴退輒感思嚴父不得
偕引滿飲痛至孺兒啼族故蕃輒聯屬倡建祠祀捐貲
先羣衆平日謹護遺書以誨諸子其少子頴則勅遣從予
聞正學力戒華縵訓飭不欲墮家聲自御麤糲而喜利

濟歲儉輒倒廩無難色邑中文田議起荷推擇為都長
輒秉公勤人不敢奸以私里人到今稱平若處士豈所
謂盛世遺民者歟配孺人嚴氏諱明莊父敏齋諱悅母
曰樊媪自幼靜重協婦儀處士少多交名士費匱率脫
簪珥替助恐後其後貲大起母則操儉茹淡紡績字畜
無殊宿昔遇妯娌臧獲宗戚人人各厭其心處士素剛
稜忌者阱械百出訟獄糾徽孺人既竭力內應又數數
潛為之和解焉四被盜橐中裝盡去處士無問孺人亦

靡有懟色晚相對益訢訢談者稱偕老匹休云翁生弘
治壬戌六月初八日距其卒七十有三孺人生先翁一
年辛酉三月初九日卒後翁二年蓋七十又六矣子四
人長梧早卒娶萬安陳氏次材娶歐陽氏次森初娶康
氏繼娶龍氏又次九韶邑庠生娶康氏女四人長適嚴
沃夫次適庠生曾一桂次適羅重桂又次適故通政楊
君載鳴孫男九人某某某某其幼孫

原缺

初通政君之講婚也翁嘗語孺人曰世非無貴乃楊君

名德非凡貴人今來議婚復何言已而通政君婚五十日遽別甫一年寡乃忍死不二今十又五年矣自非處士暨孺人義方素篤其烏能致是哉銘曰

奕奕祿岡簪綏世叢處士承蔭靡穀而豐爰擬素封連連處士嫖修維義孺人贊力內周以瘁繁祉孔儷哉哉龍門桂蘭合藏後千百禩幽閼攸光銘與俱長

明故劉母張孺人祔冢子德蘊秀才墓誌銘

曩五雲良方劉生德蘊者雪涕而告子曰炫母以嘉靖

甲子歲逝今霜露已十餘改而卜兆弗一吉炫茹痛毒
欲籲天靡從也頃侍家君陟赦原之岡矚其形勝僉曰
吉將為母藏炫慚不能自見于世以報母于是又泣濕
衣退以狀請曰得枉先生一言甚幸既二年為萬厯辛
巳德蘊復來徵言已負疴至歲之仲冬月報德蘊亦逝
矣予哭之慟曰德蘊方為母卜兆乃遂從母逝耶癸未
秋德蘊父太學生鯉江君某以書抵予曰將卜某月某
日亡子祔母歸赦原之兆并得先生枉一言也尤幸予

曰嗟乎予于德蘊曷忍無言按德蘊狀母張孺人諱順
娥為橫塘太學生張名世女年十七歸鯉江君越九月
姑方沒孺人哭泣治喪遇妯娌少長咸有禮又二姓故
巨宗紈綺珠璣競華也而服御獨喜澹不從華會舅志
齋翁某以上世故謫戍稽勾牽連羈官相去百里凡七
易稔矣歲辦轉餉未嘗日乏家族為頌以詩家故多僮
奴間有非義之饋輒峻卻之鯉江君雅謂孺人有丈夫
識是善翊我生子三長炫即德蘊次某次某從襁褓母

導之友愛嚴出入慎外交母令臧獲以醜辭誘不者必
呵禁之故三子咸從義方攻詩書屢邀藝有聲郡邑則
閭內之教篤也女一嫁為某配孺人終以疾火得年才
三十六族戚莫不悲之德蘊之從子也以丙子往來處
子精舍之同人齋計四年奮欲以學自荷瞿瞿汰其宿
嗜性剛直不能詭隨人意為舉業必精求作者意旨不
襲故常凡從子遊者昕夕履屨充戶庭而德蘊識度其
傑出云子亦奇德蘊終可入道詎謂德蘊竟舍予輒先

往嗟嗟自德蘊往而予孤矣德蘊得年若干游庠若干
年既不得志又早世其命也夫祖即某受學安成劉獅
泉先生為高第家世行誼見予所撰墓誌銘中父即某
有才識德蘊娶朱氏無嗣今以季弟次子某後之仲弟
亦庠生娶東門朱氏生子幾季弟某娶橫塘張氏子幾
次即出後德蘊女一聘予之第三孫士經嗟乎若張孺
人與德蘊母子相從一丘壠間同為地下遊豈亦生者
之悲而逝者之慰與予慟德蘊不後鯉江君故并為銘

云

猗劉母之淑兮餉厥翁百里七冬翊彼夫子為孝孔隆
猗劉生之慕兮奮厥躬植學績文爰冀顯親際命之窮
撫撫赦原天畀其吉母子相從於鑠來葉榮光佳氣盤
礴鬱葱

處士執庵王公墓誌銘

處士王姓旦名于湛字執庵其號晉太傅導之苗裔南
唐時錄金陵家泰和太學生叔可卜居西關之圻街六

世祖子與國初徵聘不就與仲氏侍御子啓俱以文行
名世高王父直少傅吏部尚書贈太保謚文端曾大父
禎封中書舍人贈奉訓大夫後軍都督府經歷大父休
生志號慎齋是為公父母蕭氏生伯兄昇劉氏生公公
幼警敏揆事多中慎齋翁最愛幸家政必諮嘗為翁爭
論偃室竟得直而翁益竒重公及遭竒疾醫家見以為
不可治翁慰甚夜夢有語云識真惟有段先生俄而覺
遽遽然夢也厥明候門有段姓者至自言神醫公果愈

公奉慎齋以孝稱伯兄昇雅有調度公師事靡有失意
初慎齋翁寢疾以至大故公侍病治喪一切如禮性最
儉朴雖世祿後即一布袍服之屢歲月無數庭訓諸子
孫純用此道其操執若不可拔故以執名其庵公接人
恭睦族歾殷生平不毛舉人陰事居常有言夫人既不幸
有不美吾從暴其短何心哉公產埒封君然逋責力不
足者悉折券示弗用素慎疾往往以經驗奇方藥人人
以此德公誦義無間言會外姑塋地未善發視繁蟻公

手為除蟻而加綿帛如故其厚類此公美髯面頰玉偉
然丈夫絕肖先貴人素尠疴人謂公當永年嘉靖丙午
二月倏足不仁公計畫無可如何卻藥曰天之亡我我
何藥為嚴命諸子擇日治服敦匠事立諸子訓榻下毋
墜先業時有南宮士李君日守者視公疾公笑曰恒言
過半百非為夭余幸耳順即不諱已安之明年五月旁
死魄正首丘距成化戊申十月初二懸弧凡五十有九
載初配雲津大尹松筠劉公之子生三男長霄次霽又

其次霈繼配鳳岡蕭子先公卒五越月霄善貨殖娶某氏霈邑諸生授儒官娶某氏霈初仕留京庫大使至梧州府經歷娶某氏孫男女子蓋林林多未艾也孫淵渙等將以某年月日厝公于某山之原以公子壻詹事府主簿歐陽君狀來乞銘銘曰

公生仕族而封君是業公承世祿而布袍自屑有類隱者公執儉約而施反近博公濟人藥而已固自卻有類達者吾何以知王氏之世昌哉翳其積厚而流故長

康東沔先生偕配胡孺人合葬墓誌銘

予邑嘉隆間有詩人康東沔先生諱恕字求仁其先匡氏至宋避太祖諱改康傳至伯瑀為泰和州學司書子克俊始家邑東至十四世仁安早卒妻陳氏以節著詔旌其間今康氏城居者咸節婦後也先生高王父宜順贈御史曾大父弘敬官至僉事大父文秀封評事父諱紀壬戌進士為南京大理左評事母王氏以乙卯如月之二日生先生方越十歲大理公卒於官先生隨王孺

人護樞歸寔是時家四壁立燬西隣火出依外家村居者八年刻勵治經書與曾松山封公雙溪藩參均研席莫逆交然先生獨負奇質有敏才補學官弟子員遂以舉子業高一時非其好也曰今士多自擅時義迄不知慕古此無異鏤脂烏能久故自為秀才輒博綜羣書作為古文詞歌吟搦管刻就奇藻全涌蓋不屑近代亟欲方駕兩漢上書法王趙邑大夫臺山周公賓禮訓子鍊等後擢進士有聲而先生以嘉靖壬午始舉於鄉己丑

會試下第卒業南雍于時文名著公卿間涇野呂公整
菴羅公雅稱其詩文逼古念菴羅公尤服其詩謂選蹀
顏謝律頡頏高岑乙未繼祖母羅孺人卒以眇身承重
獨當大事無弗嫻於禮家貧食澹然喜姱修矜名檢居
舍綰轂縣門不百武非公不曳履辛丑蹶南宮其妹壻
朱芝山督學慨曰以公之才乃竟左一第豈命也夫力
勸謁選授福建漳浦縣令漳浦屆山海民雜蛇虺險且
囂甫下車會造戶籍均賦役能力汰積弊以公平服四

境訟絕干請篤意學校首尚行誼而庶慈溢閭閻間民
議生俎豆之顧以直己忤直指使枉論罷歸今浦誌云
康公博學好古清介不阿未究厥施讀者謂實錄云既
歸翛然故儒生舊廬卑隘苦市喧力不逮徙山樊先是
圃龍洲之上有別業乃攜子姓讀書其中臨池學書晚
益工暇必挈羣從燕笑雖一豆觴盡懽又時引諸文士
倡和若廣平郡守曾二潭中丞魯原二公不敏直歐陽
生文朝至則未嘗不握手相羊樂而忘人間世也已乃

鄒歐兩文莊公劉晴川先生招會青原雲津間輒命駕
往往則相與究析羣疑曰吾乃今知學之尤樂所貴力
行先耳生平手不釋卷虛己好善見人一字之勝輒揚
不置口與廬陵吳澄塘君為文字深分詩歌力相埒出
處亦符或謂二君子咸幾淵明風致而先生為勝云所
著詩文稿若干卷配胡孺人出義和世族直從姑也外
父樂善公以弘治丙辰三月之望生孺人孺人端嚴純
明歸先生適窶輒解奩橐脫簪珥佐家無難色夙夜瞿

瞿躬操作凡間以內取裁輒片言決中外斬斬無敢佚
家節者中饋蒸嘗多手辦賓從日填而內供必旨且時
故先生得肆力文學迥然無內顧憂者則贊助力殷矣
蓋孺人繼室先生先室楊有子誼方五齡孺人祿撫不
啻已出後乃得談悉督以學凜若嚴師焉事羅孺人誠
敬跼蹐羅稱於人也必曰賢孫婦處妯娌族屬閭里恩
意咸隆篤晚益勤治生衣疏食糲迄不自德提撕子孫
婦咸然先生以隆慶己巳十二月八日捐世甫一月而

孺人亦以哀病不起蓋隆慶庚午正月十四日也長男誼娶桃源蕭氏繼南富王氏仲談娶冠朝鄧正郎孫女繼大岡郭氏俱邑庠生咸有文孫男六公望庠生娶二守李文溪女蚤卒公器娶太守曾二潭孫女公朝娶太守梁少岳孫女公暉聘寺正王茶泉女公亮公寅女四一適庠生蕭九韶一適庠生聶按一適庠生陳懋竄一適王悅臣曾孫男一雲翰女一適高壠楊大經誼歿戊寅年而談又獨當大事以今萬厯甲申年十月二十九日合厝於觀音山面

郊之原屬銘直直憶棺髮時辱先生知與稔語孺人
無以凡子遇今皓且錄錄靡能報稱銘豈敢謝銘曰
連維先生文雅天植髻能吐英千夫辟易顏謝古風
高岑近律如操龍困西盪東擊陽燧之精夜光之璧
價大售艱竟宰巖邑近民政猷儒術緣飾才豐命儉
名窮身抑返服龍洲世味滌如泛宅浮家藥欄花榭
高朋唱酬羣從絡繹一觴一詠與化無極先生之饗
五柳足匹媿也如翟內則孔翊後有式者必曰此明

詩人之玄室佳氣鬱于子孫奕奕

衡廬續稿卷九